

GUAPPARIA (DIALUGU TRA CUSCINU E LINZOLU)

Lu cuscinu na iurnata
sennu testa di miolu
cuminciò na gran limata
disprizzannu lu linzolu.

Tuttu aria e mpurtanza
cu na gran spavalderia
pi la sò granni gnuranza
scarcaniannu ci ricia.

Semu amici tutti rui
di na vecchia cunuscenza
comu v`a chi tra di nui
c`è sta granni diffirenza ?

Adurnamu tutti un lettu
stamu sempri allatu, allatu
a mia massimu rispettu
nveci tu un s`i calculatu.

Iò pinzannu lu mè statu
di la sorti mi n`alletu
sugnu sempri profumatu
e tu mori di lu fetu.

Dù labbruzzu cu russettu
ddà tistuzza profumata
chi parlannu cu rispettu
pari un sonnu la nuttata.

Penzu a tia e ti cumpatu
e mi pari piatusu
pirchè fusti destinatu
na ssù postu assai fitusu ?

Comu parli ? nun t'affrunti ?
lu linzolu ci rispusi
sti gran chiacchiri chi cunti
sù discursi di murvusi.

Sentu fetu, chissu è veru
nun mi fazzu u mussu ricciu,
ma voggh'essiri sinceru
tanti voti mi scapricciu.

Nun cuntari bummulati
tu sì zeru nfacci a mia;
quannu dui sunnu curcati
tù chi viri ? Fitinzia ?

Sennu nsemmula curcati
lu maritu e la mughghieri
di na cutra cummigghiati
tu lu sai ? soccu succeri ?

Iò li viù ddi carni bianchi
senza dillu pi cusà
cosci, minni, panza e cianchi
e la santa trinità.

Sulu iò, caru cuscinu
senza diri, c'è pirmsu ?
la Battaglia Sulfarinu
mi la viù spissu, spissu.

Tu chi nobili ti criri,
c'hannu vistu li tò occhi ?
s'un t'affrunti lu poi riri;
qualchi cursa di pirocchi !

VUCCAZZI TINTI

Vossia binirica zù Libboniu
addiu, chi t'accurri, Giammaria ?
sapi st'aiu lassannu u matrimoniu
cu la figghiastra da zzà Rusulia;
mizzica ! ci appizzi un patrimoniù;
e comu fai sta gran fissaria ?
u sacciu; ma purcazzu d'un dimoniù
mi ricinu c'a notti runfulia.

Vuccazzi tinti, cunn'annu dicoru
di tanti fimminazzi chiacchiaruna,
pirchè un dumanni a lu mè annaloru
o puru a mastru Rocco Cufuruna;
o a Ghiachinu di lu zzù Saroru
cu natri quattru, cincu o sè arzuna;
amanti d'idda tutti quantu foru
ma nun parlaru mai di runfuliuna.

Di chiacchiaru di genti, un ti livari
ascuta a unu chiù vecchiu ri tia,
si voi lu mè cunsigghiu unn'a lassari
chi doppu ti nni penti, Giammaria;
la cosa, la putemu accummirari
s'è sulu pirchè idda runfulia ?
ti la mariti, ci runi a mangiari
e ogni sira, si cucca cu mia.

NUN LU SAPIA

Papà, stiornu un ghiri a travagghiari
ma s'un travagghiu, appizzu milli liri !
e penza a la saluti, un ti scantari,
la mamma, quantu picciuli fà ghiri !
però ristannu ncasa, c'aiu a fari ?
afferra la picozza, e si ti firi ?
lu bucu di la tuppa l'allargari
ch'u lettu, tantu bonu nun si viri.

Tù lu capisci ch'è vigliaccheria ?
iri attintannu a li porti firmati ?
lu sai chi di la tuppa un si talia ?
chi nun'è signu di genti educati;
però quannu la mamma e lu zzù Ndria
stannu firmati ddà rintra attangati
sugnu sicuru chi macari a tia
ti nmistissi virè la licchitati.

Ristau cu li vrazza appinnuluni
pinzannu, sà quantu voti ha succirutu;
cu ddà carogna, cu ddù lazzaruni
sta fimmina caiorda m'ha trarutu;
persi lu sennu, persi la ragiuni
divintau n'armalu nsarvaggutu;
e comu ? mj criria un sapientuni
eppuru, nun sapia ch'era curnutu.

SCRUPULU E LIBIRTA'

Rusina occhi aperti, cu tò figghia
chi sula cu lu zitu v`a firriannu
l'hannu ncuntratu curtigghi curtigghia
cu li manuzzi chi vannu iucannu;
sai, ch'è sdisonuri p'a famigghia
siddu succidirà qualchi malannu ?
(si doppu chi la nganna un si la pigghia
va cerca li stivali di sò nannu).

Com'aiu a fari ? sugnu cunsumata
ci lu predicu tutti li mumentu
ma nun si pirsuari sta ngrasciata
la cosa l'arraggiuna diffirenti;
dici: siddu chi fussi cutiddata
lu sfregiu mi ristassi pirmanenti;
ma pi ghiucari sulu na rancata
calannu arrè la vesta un c'è chiù nenti.

DICCI CURNUTU

MEDAGLIA D'ARGENTO ACCADEMIA «G. MELI» (15 GENNAIO 1966)

S'arrampicò Niria inaspittatu
e dintra a sò mughieri unn'a viria,
darrè la porta nmezzu addinucchiatu
c'era lu picciriddu chi chiancia;
c'è la mamma cu don Furtunatu
nchiusi ccà rintra chiancennu dicia;
e ghiò staiu murennu ncuttumatu
mi scantu chi ddù beccu la struppia.

Curaggiu, minchiunazzu, un ti scantari
sà quantu beddi voti ha succirutu,
iò mi ni nesciu, nun vogghiu taliari
tù mettiti ss'agnuni mutu, mutu;
però ti raccumannu un tu scurdari
appena nesci, diricci curnutu.

ISTINTU TRARITURI

- Donna Margherita, chi caristu ?
chi caminati peggju di mè nannu.
- Mai, nun fù caruta, santu Cristu
li dulura mi stannu rusicannu;
stiornu specialmenti nun'esistu
chissu è lu beni chi li figghi dannu !
- Cu dù figghioli suli chi facistu
possibili ricari ssù malannu ?
- Donna Maricchia, nun siti nformata
vurria chi fussi viva donna Betta.
- Aviti statu sempri na sta strada ?
iò vi canusciu a Lucia e Cuncetta !
- Chissi li fici doppu maritata
ma sei li sdivacai mentr'eru schetta.

E PARIA SANTA

Lu corpu di n'artista mudillatu
la vuci, un duci sonu di viola,
labbra curaddu, la facci granatu
paria lu sò nasiddu mustazzola,
l'occhju cilesti, lu sguardu fatatu
li capidduzzi, cannola, cannola;
iò nn'eru pazzamenti nnamuratu
ma mai ci avia rittu na palora.

Un sabatu però mj rinisciu
a la finestra la vitti affacciata,
ci dissi: ti salutù, sangu miu
idda cu la sò vucca nzuccharata,
a lu salutù nun mi rispunnio
mi retti nsutta, nsutta na taliata;
ma vi lu giuru com'è veru Diu
parsi chi m'arrivò na scupittata.

Na siritina sula la ncuntraì
ci dissi: dunni veni? Rusulia,
ivi ddà ghiusu ni mè zzu Nanai
e ora staiu turnannu ncasa mia.
M'armai di curaggiu, ci ncugnai,
lu cori, forti forti mi battia;
picciotti, un vitti chiù, mi la vasai
quannu mi dissi: tantu ci vulia?

LA ME' PRUDENZA

Dunn'è ch'un m'interessa un mettu nasu
nun fazzu nudda cosa all'impruvvisu
mi vogghiu fari sempri pirsuasu
n'ogni cosa voggh'essiri precisu
nun dicu na parola fora casu
ogni risposta la misuru e pisu;
di tutti li Pueta du Parnasu
doppu l'ultimu postu sugnu misu.

Si trov cosi torti un mi spaventu
cercu di sistimarli ar'antu, ar'antu,
pi ogni chiaia ci trovu lu nguentu
riparu a tutti sutta lu mè mantu,
mentri mi reggi lu mè sintimentu
mancu di lu diavulu mi scantu;
ancora lottu contru un riggimentu
un piattu beddu chinu lu svacantu.

Ogni matina a li cincu sdugnu
ancora vecchiu mi sentu firrignu,
si fazzu qualchi sbagliu e un mi n'addugnu
mi pirdunati si ni sugnu dignu;
li mè virtù a nuddu ci li rugnu
ma li cunservu tutti dintra un scrignu;
e quannu nsipultura iuntu sugnu
a Diu chi mi li retti li cunsignu.

Mentri supra sta terra ancora staiu
nun pozzu fari finta chi nun viu,
s'eranu picca li guai chi aiu ?
ora natru malannu m'accresciù,
ma poviru di mia chi curpa n'aiu
siddu la mè saluti scumpariu ?
« ma finu a quannu moru e mi ni vaiu
speru di fari comu voli Diu ».

LU PORTALITTRI

Un'omiceddu cu lu visu tunnu
cu na vurza a tracollu caricata
firria sempri di la cima a funnu
tissennu lu paisi in'ogni strata,
porta nutizzi di tuttu lu Munnu
pi patri, matri, figghiu o fidanzata
li picciotti chi namurati sunnu
l'aspettanu cu l'anima nfucata.

Comu risisti iò nun lu cumprennu
camina apperi tutta la iurnata
mischinu comu fà tuttu l'invernu
cunnuciri par'acqua o la ncirata ?
a la stasciuni, cu ddu suli mpernu
cammisa di sururi assammarata;
si stanca mischineddu e s'avvilisci
e nun c'è nuddu chi lu cumpatisci.

E ognerunu ch'a sò vuci senti
lu patri, matri, vecchi o li picciotti
a la sò vuci rispunni presenti
sduna di cursa spalanca li porti,
ci sù chiddi chi restanu cuntenti
ma c'è cu malirici la sò sorti;
e iddu senza chi ni sapi nenti
è messaggeru di vita e di morti.

Un'omu saggiu, onestu, assistimatu
spertu, billicchittusu no parlari
di tuttu lu paisi rispittatu
e stu rispettu u sapi ricambiari;
ma siddu un gnornu veni cungiratu
li pacicoti c'havissimu a fari ?
prigari a Cristu si nun'è piccatu
p'eternamenti lassallu campari.

CI PENZI ?

Ci penzi ancora donna mariola
quannu iucavamu a zita e lu zitu ?
ci penzi quannu a sciuta di la scola
sinniamu ncampagna no zù Vitu;
di beddi cursi viola, viola
ammucciaredda nmezzu lu vignitu,
ci penzi ? quannu rintra a vardiola
e tanti voti nmezzu lu cannitu.

Ci penzi chi na vota don Nanai
ni vitti abbrazzateddi a tutti rui ?
vagabbunnazzu mi rissi: chi fai ?
sta vota l'oru si cula ntra nui;
tu ti calastì l'occhi, iò scappai
successi frati meu un fui, fui
iò sti cusuzzi nun li scordu mai
tu nveci fingi ch'un ci penzi chiui.

Partivi pi surdatu e mi scurdasti
forsi un virivi l'ura chi partia
difatti a li tri misi ti spusasti
e ghiò surdatu nguerra cumbattia;
a lu Parrinu ci lu cunfissasti
quantu piccati facisti cu mia ?
a tò maritu, ci lu cunfirasti
cusà ddu galant'omu un nu sapia ?

Finiu la guerra iò mi cungirai
e riturnavi a lu paisi miu
di tia a na vicina dumannai
mi rissi: di Paceca scumpariu
cu nautra picciotta mi spusai
na casa di figghioli mi inchiu
cu idda i nozzi d'oru fistiggiai
cu l'assistenza di l'eternu Diu.

Facemu ancora chiddu chi putemu
li peni e li malanni suppurtamu
la sira prima chi n'addurmiscemu
almenu un vasuneddu si lu ramu
du lettu la matina un ni susemu
siddu chi natra vota unn'abbrazzamu
pi sta filicità chi ni gudemu
a Diu chi ni la runa ringraziamu.